

Säänöt minuriteettikieliavustuksele



TOKYMENTTINIMI	Säänöt minuriteettikieliavustuksele	VOIMASSA	2023-10-09-
TOKYMENTTITYYPPI	Säänöt	PÄÄTÖS OTETTU	Kunnanhallitus, 2023-10-09 § 118
TOK.OMISTAJA	Kunnanhallitus	VERSUUNA	3.0
TOK.VASTUULINEN	Kultur- och Minoritetsutskottet	REVITEERATTU	Kunnanvaltuusto, 2024-02-12

Sisältö

Säänot minuriteettikieliavustuksele.....	1
Tausta.....	3
Ehot.....	3
Hakija.....	4
Tarkotus.....	4
Hakemusaika.....	4
Hakemusprusessi.....	4
Päätöksenteko.....	5
Vähentäminen, perutus ja takasimakso.....	5
Kontrolli ja raporteerinki.....	5

Vakituiset säänot minuriteettikieliavustuksele

Nämät säänot minuriteettikieliavustuksele koskeva pääasiassa tukea kulttuuri- ja kielitoimintaan, joka tulee valtionavustuksesta meänkielele ja suomen kielele, mutta kans toimintaan muilla minuriteettikielillä.

Tausta

Pajalan kunta kuuluu meänkielen ja suomen kielen hallintoaluesheen. Tämä tarkoittaa ette kunnala oon erityinen vastuu suojata meänkielen ja suomen kielen asemaa. Vahvistamalla minuriteettisuoja Pajalan kunta suojaa ihmisoikeuksia.

Pajalan kunta saapi vuosittain valtionavustusta niistä lisäkustannuksista jotka kuuluva meänkielisten ja suomenkielisten oikeuksiin hallintokunnassa lain mukhaan (2009:724) kansalisista minuriteetistä ja minuriteettikielistä.

Ylheiset ehot

Stockholmin lääninhallitus oon antan seuraavat ohjeet valtionavustusten käytöstä: "Rahat ei saa mennä asioihin mikkä jo entisthään oon kunnan vastuula, esimerkiksi tulkin käythöön eli muihin velvolisuuksiin mitä kunnala jo oon".

Maholiset käyttökohteet oon:

- tialooki ja neuottelut minuriteetitten kans
- kartotus
- informasuunia ja käänöksiä
- tarkasteluja ja muutoksia orkanisasuunissa
- kulttuuri- ja kielipanoksia
- minuriteetitten ja minuriteettikielitten näkyvyys, esimerkiksi kyltit
- mupiliseerinkipanoksia, esimerkiksi kirjoja/oppimateriaalin osto
- osa persunaalikuluista
- toimintasuunnitelma

Pajalan kunta saattaa valtionavustuksesta antaa tukea kulttuuri- ja kielitoimile, jotka suojaava ja eistävä kansalisia minuriteettiä ja minuriteettikieliä.

¹ Länsstyrelsen i Stockholms län (2019): Nationella minoriteteters rättigheter En handbok för kommuner, landsting och regioner

Hakijat

Orkanisasuunit saattava hakea tukea kulttuuri- ja kielitoiminthaan kansalisille minuriteetile ja minuriteettikielile. Vain orkanisasuunit saattava hakea minuriteettikieliavustusta.

Hakija pittää olla toiminassa Pajalan kunnassa eli harrastaa paikasta riippumatonta toimintaa (esimerkiksi internetissä).

Tarkotusperä

Tarkotusperä oon ette tukea kielen lakia (2009:600) 8 §:n ja lakia (2009:724) kansalisista minuriteetistä ja minuriteettikielistä.

Avustusta annethaan vain kulttuuri- ja kielitoimen osarahottamisheen.

Avustusta annethaan vain toimile mikkä oon auki kaikile.

Avustusta annethaan vain toiminalle joka oon huumeton.

Avustusta ei anneta huvi- eli virkistysreishuin.

Avustusta ei anneta reisuihin Ruottin, Suomen ja Norjan ulkopuolela.

Kulttuuri- ja kielitoihmeet jotka tukevat lasten kehitystä kulttuuri-identiteetissä ja oman minuriteettikielen käytössä, oon etusiala.

Kirjalisuustuotantoa saatethaan tukea ostamalla valhmiita kirjoja. Avustusta ei anneta julkasukostanukshiin.

Hakemusaika

Hakemusaika 1

Viiminen hakemuspäivä kevän ja kesän aktiviteethiin oon 1. helmikuuta/fepryaaria.

Hakemusaika 2

Viiminen hakemuspäivä syksyn aktiviteethiin oon 1. kesäkuuta/jyyniä.

Päätökset aktiviteetistä/projektista näitten sääntöjen mukhaan otethaan jatkuvasti minuriteettilautakunnassa. Minuriteettilautakunnan puheenjohtaja saattaa telekasuunipäätöksellä pitentää eli muuttaa hakemusaikaa.

Hakemusprusessi

Hakemusta tehään e-planketila sivula pajala.se, eli Pajalan kunnan planketilla.

Hakija pittää jättää täyeliset hakemuspaperit hakemuksen matkassa.

Hakemus pittää olla kirjetettu ruottin-, suomen-, eli meänkielelä.

Hakemus pittää olla allekirjetettu hakijalta.

Päätöksenteko

Puutheeliset eli väärin täytetyt hakemukset käsitelään lisämisen jälkeksi.

Virkamies valmistaa hakemukset laitten, säänoitten ja minuriteettilautakunnan päätetyitten priuriteerinkitten mukhaan. Minuriteettilautakunta päättää jakamisesta kevän, kesän ja syksyn aktiviteetile/prujektile.

Avustuksen vähentäminen, peruminen ja takasimakso

Kunnala oon oikeus rekleerata vaatimukset yhistyksiltä ja muilta hakijoilta vähentämällä eli kokohnaan perumalla avustuksia.

Kunnala oon oikeus vaatia takasin koko eli osa avustuksesta, jos sitä ei ole käytetty hakemuksen mukhaan. Hakija ei saa pittää ylimääräsiä prujektirahoja. Ylimääräset rahat pittää lähättää takasin kahen (2) kuukauen sisläle ja niitä ei saa käyttää toisheen prujekthiin.

Kunnala oon oikeus vaatia takasin koko eli osa avustuksesta, jos raporteerinkiä ei ole tehty.

Kontrolli ja raporteerinki

Kunnala oon oikeus pyytää tarpheelisia tokymänttiä kontrollia varten.

Aktiviteetti/prujekti pittää olla raporteerattu kunnale viimisthään kaks (2) kuukautta jälkhiin prujektin loppua, kuitekki viimisthään 15. joulukuuta/tesemperii joka vuosi.

Panoksitten jälkhiin, ilman muistutuksia, hakija pittää kirjalisesti selittää kunka avustusta oon käytetty. Kulut ja tulot pittää spesifiseerata.

Kunnala oon oikeus vaatia takasin koko eli osa avustuksesta, jos raporteerinkia ei ole tehty.

Kunnala oon kans oikeus pyytää tarpheelisa tokymänttiä kontrollia varten.

Avustusta maksethaan ko minuriteettilautakunta oon hyväksynny hakemuksen. Maksoa saatethaan erityistaphauksissa tehä etukätheen, jos minuriteettilautakunta sen myöntää.

Avustuksen saaja vastaa itte avustuksen tillaamisesta Pajalan kunnasta. Avustuksia, joita hakija ei tilla kuuen (6) kuukauen sisäle avustuspäätöksestä, peruhaan automaattisesti.